

Vg
2261.



Qm





Ob man
für dē ster
ben fliehen
muge.

Mart. Luther

M. D. XXVII.



Dem Wüirdigen Herrn Doctor

Johanni hess pfarher zu Breslaw / sampt sey
nen mitdienern im Euangelio Christi.


Martinus Luther.



Nad vnd fride von Got vnserm vater
vnd dem HERRN Ihesu Christo. Ewz fra-
ge / so jr anher gen Wittemberg zu vns geschic-
ckt habet / nemlich / ob ein Christen mensche
gezime zufliehen in sterbens leüfften / haben
wir langst empfangen. Vnd solten auch wol
langest drauff haben geantwortet. Aber Got der almechtige
hat mich etliche zeit her in der zucht vnd staupe so hart gehal-
ten / das nicht vil lesens noch schreibens hat bey mir sein müs-
gē. So habe ich euch gedacht / Weil Got der vater aller Barm-
herzikeit euch so reychlich begabet hat mit allerley verstand
vnd warheit in Christo / wurdet jr / durch des selbigen geist vñ
gnade wol selbst / on vnser zuthun / solche vnd wol grössere fra-
gen entscheyden vnd richten.

Nu aber ewi anhalten nicht ablest / vnd euch so fast demüti-
get / das jr auch vnser meynung hyerynn zu wissen begeret / auf
das (wie S. Paulus allenthalben leret) eynerley synn vnd les-
re bey vns allensampt erfunden werde / so geben wir euch hiez
mit vnser meynung / so vil vns Gott verleyhet / vnd wir ymer
Begreiffen mügen zuerkennen / Vnd wöllen die selbigen mit
aller demut / ewiem verstandt / vnd aller frumer Christen / wie
sichs gepürt / zu urteylen vnd richten vnterwoiffen haben / Vñ
nach dem auch bey vns alhie vnd anderswo mehr des sterbens
geschrey gehet / habē wirs durch den druck lassen ausgehen / ob
vileicht auch andere / solcher vnser vnterricht begeren vñ brau-
chen würden.

Zuffs erste / stehen etliche feste drauff / Man müsse vnd sol-
le nicht fliehen in sterbens leüfften / sonder weil das sterben ist



eine straffe Gottes vns zugeschickt vmb vnser sünde willē/sol
le man Got still halten vnd der straffe gedultiglich erwarten/
in rechtem festen glauben. Vñ achtens schier für vnrecht vñ
mißglauben an Got. Die andern aber haltē/ Man müge wol
fliehen/sonderlich die so nicht mit empten verhaßtet sind.

Die ersten/weys ich irer guten meynung halben nicht zu ta
deln/Denn sie eine gute sache rühmen/nemlich/einen starckē
glauben. Vnd sind zu loben in dem/das sie gerne wölten alle
Christen im starcken festen glauben haben. Es gehört auch nit
ein Milchglaube dazu/das man des todes gewarte/vor wel
chem sich auch fast alle heyligen entsetzt haben/vnd noch entse
zen/Vñ wer wolt die nicht lobē/die mit ernst so gesynnet sind
das sie des todes nicht gros achten/vnd sich vnter Gottes rus
te williglich geben/so ferne das solchs auch geschehe/on Got
tes versuchunge/wie wir hören werden.

Aber weil es vnter den Christen so gethan ist/das der star
cken wenig vnd der schwachen vil sind/Kan man fürwar nicht
eynerley allen auffladen zu tragen. Ein starckglaubiger Kan
gifftrüncken vñ schadet im nichts. Marc. vlt. Ein schwach
glaubiger aber trüncke den todt daran. Petrus Kunde auff dem
meer gehen/da er starck im glaubē war/Aber da er zweyfelt vñ
schwach im glauben ward/sanck er vnter vnd wolt ersuffen.
Ein starcker so er mit eym schwachen wandert/müs er warlich
sich schickē/das er nit nach seiner stercke lauffe/Er lieff sunst
den schwachen balde zu tode. Tu wil Christus seine schwache
nicht verworffen haben/wie S. Paulus Rom. 15. vnd 1. Co
rinth. 12. leret.

Vnd das wirs kurz vnd eygentlich fassen/sterben vnd tode
fliehen/mag geschehen zweyerley weyse. Das erst/so es ge
schicht wider Gottes wort vnd beselh/Als nemlich/Wo y
mand vmb Gots wort willen gefangen were/vnd auff das er
dem tode entliesse/Gots wort leucktet oder widerriesse. In sol
chem fal/hat yederman einen öffentlichen beselh vnd gepot
von Christo/das er nicht fliehen/sonder lieber sterben sol/wie
er spricht/Wer mich verleucktet vor den menschen/den wil ich

wider verleucken vor meinem Vater im hymel. Vnd Matth.
10. fürcht nicht die so den leyb tödten/vnd darnach nichts ha-
ben/das sie thun etc.

Desselbigen gleichen/die so im geystlichen ampt sind / als
prediger vnd seelsorger/sind auch schuldig zu stehen vnd bleibē
in sterben vnd todts nöten/Denn da stehet ein öffentlicher be-
felh Christi/ Ein güter hirt lest sein leben für seine schaff/ Aber
ein miedling sihet den wolff kumen / vnd fleucht / Den im ster-
ben darff man des geystliche ampts am aller höchsten / das da
mit Gots wort vñ Sacrament die gewissen stercke vnd tröste
den tod im glauben zu überwinden. Doch wo der prediger so
vil vorhanden were / vñ sich vnternander selbs vereyniget /
das sie etliche vnter in weg zu zihen vermanetē / als die on not
in solcher fahr: blibē / acht ich / Es solt nicht sünde sein / weil dz
ampt sunst gnügsam versorget were / vñ sie / wo es not were / zu
bleiben willig vñ bereit sind / Gleich wie man von S. Athana-
sio lisset / das er von seiner kirchen floh / auff das sein lebē erret-
tet würde / weil sunst vil da waren / die des ampts wartetē. Itē
S. Paulus liessen die brüder zu Damasco durch die mauren in
einem korbe / das er entran / Acto. 9. Vnd Acto. 19. lies er sich die
Jünger haltē / das er sich nicht auff den marckt gab in die fahr
weyles nicht not war.

Demnach sind auch alle die so in weltlichen ämpten / als
Bürgermeyster vnd richter / vnd der gleichen / schuldig zu bley-
ben / Den da ist abermal Gots wort / das die weltliche oberkeit
einsetzt / vnd befihlt die stad vnd land zu regiern / schützen vnd
handhaben / wie S. Paulus Ro. 13. sagt. Die oberkeit ist Gots
dienerin / fride zu handhaben etc. Den es gar ein grosse sünde
ist / Ein ganze gemeyne / die yemand zu versehen befolhen ist /
so lassen on haupt vñ regiment sitzen / in aller fahr / als ist / Sewa-
Mörder / Maffrur / vnd allerley vnfal / das der teuffel möcht zu-
richten / weil kein ordnung da ist. Vnd S. Paulus spricht / Wer
die seinen nicht versorgt / verleückt den glauben / vnd ist erger
denn eyn Heyde. Fliehen sie aber ia für grosser schwacheit /
sie zu sehen / vnd stellen an jre stat gnügsame verwalter / danis

die gemeyne wol versehē vnd verwalet sey/wie droben gesagt ist/Vñ vleissig darnach forschen vñ drauff sehen/das also gehe.

Was nu von disen zwey ampten gesagt ist/sol auch verstanden werden von allen andern personen/so mit dienst oder pflicht verbunden sind aneinander. Als ein knecht sol nicht fliehē von seinem Herrn/noch eyne magd von ihrer frawen/Es sey denn mit wissen vnd vulaub des Herrn oder frawen. Widerumb ein Herr sol seinen knecht nicht lassen/noch ein fraw ire magd/Es sey denn/das sie die selbigen sunst vnd anderswo versorgen gnugsamlich. Denn in disen stücken allen ist Gots gepot/das knecht vnd megde sollen gehorsam seyn/vnd sind verbunden. Widerumb herrn vnd frawen ihr gesinde versorgen. Also auch ist Vater vnd mütter gegen kindern/vnd widerumb kinder gegen vater vnd mutter durch Gots gepot verbunden zu dienen vnd zu helffen etc. Item was gemeyne personen sind/auff solt vnd lohn gedingt/als ein stadt arzt/stadt diener/söldener/vnd wie die mügen genennet werden/mügen nicht fliehen/sie bestellen denn andere tüchtige vñ gnugsame an ire stat/die von den Herren angenommen werden sollen.

Denn wo sunst kein eltern sind/da sind auch die fürmunden vñ nehistē freundschaft bey iren freunden zu bleybē schuldig/oder ye mit vleis verschaffen/das an ire stat andere seyen/die ire krankē freunde versorgen. Ja es kan kein nachbar vom andern fliehen/wo sunst nicht sind/die der krankē mügen an ire stat warten vnd pflegen. Den in disen sellen ist allerortte der spruch Christi zusürchten. Ich bin krankē gewesen/vnd jr besucht mich nicht etc. Aus welchem spruch wir alle sind aneinander verbunden/das keins das ander lassen sol in seinen nöten/sonder schuldig ist im beyzustehen vnd helffen/wie er wolt im selber geholffen haben.

Wo aber solche not nicht ist/vnd sunst gnug fürhandē sind/die da warten vnd versorgen/Es sey durch ihr eygen pflicht oder wilkür/oder durch der schwachglawbigen verschaffung ge bestellet/das man ihr nichts dazu bedarff/Vnd zumor/so es

die krankhen nicht haben wollen / sonder wegern. Da achtich /
sey es frey / beyde zu fliehen vnd zu bleyben. Ist yemandt so keck
vñ starck im glauben / der bleybe im namen Gottes / Er sündigt
freylich dadurch nicht. Ist aber yemandt schwach vñ forchtig /
der fliehe im namen Gottes / weyl er solchs thut on nachteyl sei-
ner pflicht gegen seynem nehesten / sonder mit gnugsamer ers-
tatunge durch andere versorget vñ bestellet. Den sterben vñ tod
zufliehen / vnd das leben zurretten / ist natürlich von Got eingez-
pflantz / vnd nicht verboten / wo es nicht wider Got vnd den
nehesten ist / wie S. Paulus sagt Eph. 4. Niemandt hasset sein
fleysch / sonder wartet vñ pfleget sein. Ja es ist gebottē / das ein
yeglicher sein leyb vñ leben beware vnd nicht verwarlose / so vil
er yimmer kan / wie Sanct Paulus sagt. 1. Corinth. 12. Das Got
die gelidmaß gesetzt hat in leybe / das yimmer eins für das ander
sorget vnd schaffet.

Ists doch nicht verboten / sonder vil mer gebotten / das wir
im schweyß vnser angesichts / vnser teglich narunge / kleydung
vnd allerley notturfft suchen / vñ schaden oder not meyden / wo
wir können / so ferren solchs geschehe / on schaden oder nachteyl
der liebe vnd pflicht gegen vnsern nehesten. Wie vil billicher ist
den / das man das leben suche zur erhalten vnd den todt fliehe /
wo es sein kan / on nachteyl des nehesten / Syntemal leyb vñ le-
ben ja mer sind / den speyße vnd kleyder / wie Christus selbs sagt /
Matth. 5. Ist aber yemandt so starck im glauben / das er wil-
liglich blosser / hunger vñ not leyde kan / on Gottes versuchē / vñ
sich nicht wil herauß arbeyten / ob er wol künde / der fare seynes
weges auch / Vnd verdamme die nicht / die solchs nicht thun /
oder nicht thun können.

Das aber den todt fliehen / für sich selbs / nicht vnrecht sey / Be-
weyßen gnugsam die Exempel der schaffe. Abraham war eynt
grosser heylige / noch forchte er den todt vnd floch in / mit dem
scheyn / do er sein weyß Sara seine Schwester nennet. Aber weyl
er das thet on seines nehesten nachteyl oder versäumen / wirds
im für keine sünde gerechnet / Desselbigen gleichen thet sein sun
Isaac auch. Item Jacob floch für seinem Bruder Esau / das er

nicht ertödtet wurde. Item David floch für Saul vnd Absalom. Vnd der Prophet Orias floch in Egypten für dem König Joakim. Auch Elias. 3. Regum. 19. der thürstige Prophet / do er die Propheten Baal hatte alle erwürget durch den grossen glaubē / doch do in die Königin Isebel ließ trewen / forcht er sich vnd floch in die wüsten. Vnd vor im Moses / do in der König in Egypten suchte / floch er ins landt Midiam. Vnd so fort an vil andere. Dise alle sind vor dem tod geflohen / wo sie gemocht haben / vnd das leben erredtet / doch so ferren / das sie dem nehesten damit nichts entwand haben / sonder zuvor außgericht / was sie schuldig waren.

Ja sprichstu / dise Exempel reden nicht vom sterben oder pestilenz / sonder vom tode / so durch verfolgung kumbt. Antwort. Tod ist tod / er kumē wo durch er kumē / So zeucht Got seine vier plagen oder straffen an in der schufft / als die pestilenz / hunger / schwerdt vñ wilden thiere. Mag man nu der selbigen ein e oder etliche fliehen mit Got vñ gutem gewissen / warumb auch nicht alle viere? Die vorigen exempel zeygen an / wie die lieben heyligen väter haben das schwerdt geflohen / So ist ja offenbar genug / das Abraham / Isaac / vnd Jacob mit seinen sinnen flohen die andere plage / nemlich den hunger oder theürunge / do sie in Egypten zogen für der theürung / wie wir in Genesi lesen. Also warumb solt man nicht für den wilden thiern fliehen? So höre ich wol / wen ein krieg oder der Turck keme / so solt niemandt auß ein Dorffe oder Stetlein fliehen / sonder alda der straffe Gottes durchs schwerdt erwartē. Ist wol war / wer so starck ist im glauben / der warte sein / Aber er verdamē die nicht so da fliehen.

Also auch wenn ein hauß brennete / müste niemandt herauß lauffen oder zu lauffen zu retten / dan feür ist auch ein straff Gottes. Vñ wer in ein gross wasser fiel / müst nicht herauß schwimmen Sonder sich dem wasser lassen / als Götlicher straffe. Wolan kanstu es thun / so thü es / vnd versuche Got nicht / Lass aber die andern thun was sie vermügte. Item / wen einer ein beyn breche / oder verwundet / oder gebissen were / müste ers nicht heylen lassen / sonder sagen / Es ist Gottes straffe / die wil ich tragen / bis

selber heylet. Frost vnd Winter ist auch Gottes straffe daran
man möcht sterben/Warumb lauffestu zum feur oder in die stur-
ben? Sey starck vnd bleybe im frost bis es wid er warm wirdt.
Mit der weyse müst man kein Apoteker noch ertzney noch ertzte
haben/Dan alle krankeyt sind Gottes straffe. Hunger vñ durst
ist auch grosse straffe vnd marter/Warumb issest vnd trinckest
du dan/vnd less est dich nicht damit straffen/bis selber auffhö-
ret? Zu letzt solten vns wol solche rede dahyn dungen/das wir
das Vater vnser abtheten vñ beten nicht mer/ Erlöse vns vom
vbel. Amē. Syntemal allerley vbel auch Gottes straffe ist. Vnd
müsten hynfurt auch nicht bitten wider die helle/ noch sie meys-
den/Dan die ist auch Gottes straffe. Was wolt darauß werdē?

Auß dem allem nemen wir solche vnterricht./Wir sollen wi-
der allerley vbel bitten vñ auch vns dafür hüten / wie wir könn-
nen/so ferren/das wir nicht wider Got damit thun/wie droben
gesagt ist/Wil vns Got darinnen haben vnd würgen/so wirdt
vnser hüten nichts helffen/ Auß das eyn yeglicher seyn hertze
also richte. Erstlich/ist er gebunden/das er muß im sterben bley-
ben/seinem nehesten zu dienst/so befelhe er sich Got vnd spreche
Herr in deiner hand bin ich/du hast mich hie angebundē/Dein
wille geschehe/Dann ich bin dein arme Creatur/Du kanst mich
hieryn tödten vnd erhalten/so wol/als wenn ich etwa im feur/
wasser/durst/oder andere schrligkeyt angebunden were. Ist er
aber loß vnd kan fliehen/So befelhe er sich abermal vñ spreche/
Herr Got ich bin schwach vnd forchtsam/Dumb fliehe ich das
vbel vnd thū so vil darzu als ich kan / das ich mich dafür hüte.
Aber ich bin gleichwol in deiner hand/in disem vñ allerley vbel
so mir begeggen mügen/ Dein wil geschehe/ Dann meine flucht
wirds nicht thun. Syntemal eytel vbel vnd vnfal allenthalben
ist/Dan der teuffel feyret vñ schlesst nicht/welcher ist ein mör-
der von anfang/vnd sucht allenthalben eytel mord vñ vnglück
anzurichten.

Den auß die weyse müssen wir vñ sind schuldig mit vnserm
nehesten/auch in allen andern nöten vñ fahr zu handeln. Bü-
net sein hauß/so heist mich die liebe zu lauffen vñ helffen lesche.
Ist

Ist sunst volck gnug das da leschen kan / mag ich heym gehen
oder da bleyben. Fellet er in ein wasser oder grüben / so mus ich
nicht dauon / sondern zulauffen / wie ich kan / vnd jm helfen /
Sind ander da / die es thun / so byn ich frey. Sihe ich das er hun
gert oder dürstet / so mus ich jm nicht lassen / sonder speysen vñ
trenchen / vnd nicht ansehen die fahr / ob ich arm oder geringer
dadurch werde. Denn wer dem andern nicht ehe wil helfen vñ
beystehen / er müge es denn thun / on fahr vnd schaden seynes
güts oder leybs / der wirt nymer nicht seinem nehesten helfen
Denn es wirt allezeit sich ansehen als sey es jm selbs ein ab
bruch / fahr / schaden oder verseumnis. Kan doch kein nachbar
bey dem andern wonen on fahr / leybs / guts / weybs vnd kinds /
Denn er mus mit jm wage / das ein ferer oder ander vnfall aus
seines nachbars hause kumme / vnd verderbe jm mit leyb / gut /
weyß vnd kind vnd allem was er hat.

Denn wo einer dem andern solchs nicht thet / sonder liesse
seinen nehesten so ligen in nöten / vnd flohe von jm / der ist für
3. Got ein mörder / wie S. Johannes sagt in seiner Epistel. Wer
seinen bruder nicht liebt der ist ein mörder. Vnd abermal / So
yemand diser welt güter hat / vnd sihet seinen nehesten not lei
den / wie bleibt die liebe Gottes in jm / Denn das ist auch der
sünden eyne / die Gott der Stadt Sodoma zurechent / da er sprü
cht durch den propheten Ezechiel / Sihe das war die sünde der
ner Schwester Sodoma. Müßiggang / fülle vnd gnüge / vnd
reichen dem armen die hand nicht. So wirt auch Christus
am Jüngsten tage sie verdammen als mörder / da er sprechen
wird / Ich war krank vnd jr besuchet mich nicht. So aber die
sollen so geurteylt werden / die zu den armen vnd krankten nit
gehen vnd hülfte anbieten / Wie wils den gehen / die von jm
lauffen / vnd lassen sie ligen wie die hunde vnd serwe? Ja wie
wils denen gehen die den armen noch dazu nemen was sie ha
ben vnd legen in alle plage an? Wie yetzt die Tyrannen thun
mit den armen leuten / so das Euangelion annemen. Aber laß
gehen / sie haben ire vnteyl.

Wol war istis / wo ein solch stadlich regiment in stedten vñ

B

*war ein
mörder Rey.*

16 ray.

landen ist / das man gemeyne heuser vñ spital kan halten / vnd mit leuten / die jr warten / versorgen / da hin man aus allen heusern alle krankē verordnete / wie denn vnser vorfarē freylich solchs gesucht vnd gemeynet haben / mit so vil stifften / spitalen vnd siechheusern / das nicht ein yeglicher bürger in seynem hause müst ein spital haltē / das were wol fein / löblich vñ Christlich / da auch billich yederman mildiglich zu gebē vñ helffen solte / sonderlich die oberkeit. Wo aber das nicht / als den an wenig orten ist. Da müssen wir für war / einer des andern spitalmeyster vnd pfleger sein in seinen nöten / bey verlust der seligkeit vñ Gottes gnaden / Den da stehet Gottes wort vñ gepot. Liebe deinē nehistē als dich selbs. Vñ Mat. 7. Was jr wöllet das euch die leute thun sollē / das thut auch jr denselbigen.

Wo nu das sterben hinkumet / da sollen wir so do bleyben / vns rüsten vñ trösten / sonderlich / das wir aneinander verbunden sind (wie droben erzelet ist) das wir vns nicht lassen könnē noch fliehen von einander. Erstlich damit / das wirs gewiß sind / Es sey Gottes straffe / vns zugeschickt / nicht alleyne die sünde zu straffen / sonder auch vnsern glauben vñ liebe zuuersuchen / Den glauben / auff das wir sehen vnd erfare / wie wir vns gegen Got stelle wöllē. Die liebe aber / auff das man sehe / wie wir vns gegen den nehesten stellen wöllē / Denn wiewol ich achte / das alle Pestilenz / durch die bösen geyster werdē vnter die leute gebracht / gleich wie auch andere plagen / das sie die lufft vergifften / oder sunst mit eynem bösen odem anblasen / vñ damit die tödtliche gifft in das fleisch schiessen / So ist doch gleichwol Gotes verhengnis vñ seine straffe / der wir vns mit gedult vntergeben sollen / vnd vnserm nehesten zu dienst / also vnser leben in die fahr setzen / wie S. Johannes leret vñ spricht Hat Christus sein leben für vns gegeben / so sollen wir auch für die brüder vnser leben lassen.

So aber yemand das grawen vnd schawen für den krankē anstosset / Der sol einen mit nemen / vñ sich also stercken vnd trösten / das er nit zweyffel / Es sey der teuffel / der solche schewforcht vnd grawen erregt im herten / Denn so ein bitter böser

teuffel ist / das er nicht alleynen vnnterlas zu tödten vñ mör-
den sucht / sondern seine lust damit büßen wil / das er vns schew
erschreckt vnd verzagt zum tode mache / auff das vns der tode
ia auff aller bitterst werde / oder yhe das leben keyn rüge noch
fride habe / vnd vns also mit diecke zu diesem leben hinaus stose
se / ob er möcht zu wegen bringen / das wir an Got verzweyffe
leten / vnwillig vnd vnberet zum sterben wurden / vñ in solch
er forcht vnd sorge / als im tunceln wetter / Christum vnser lie-
cht vnd leben vergessen vnd verloren vnd den nehesten in nö-
ten liessen / vnd vns also versündigeten an Gott vnd mensche
das were sein hertz vnd lust. Weyl wir den wissen / das des teuf-
fels spil ist solch schrecken vnd fürchten / so sollen wir wider-
umb vns desselbigen nur deste weniger an nemen / jm zu trotz
vnd verdriess eyne mut fassen / vnd sein schrecken wider auff
jn treyben vnd von vns weisen / Vnd mit solcher rüstunge vns
weren vnd sagen.

Heb dich teuffel mit deym schrecken / Vnd weyl dichs ver-
dreust / so wil ich dir zu trotz nur deste ehe hinzu gehen zu meinē
nehesten krancken / jm zu helffen / vnd wil dich nicht ansehen /
Vnd wil auff zwey stuck gegen dich pochen. Das erst ist / dz ich
fürwar weiß / das diß werck Gotte vñ allen Engeln wolgefel-
let / vnd wo ichs thū / das ich in seinem willen vñ rechten Gots
dienst vñ gehorsam gehe / vñ sonderlich weyl es dir so vbel ge-
fellet / vñ du dich so hart da wider setzest / so mus es freylich in
sunderheit Gotte gefallen / Wie willig vnd frölich wolt ichs
thū / wens nur einem Engel wol gefiele der mir zusehe vñ sich
mein drüber frewete. Tu es aber meym Herrn Ihesu Christo
vnd dem ganzen hymnischen heere wol gefellet / vnd ist Gotes
meyns vaters willen vnd gepot / was solt mich dein schrecken
denn bewegen / das ich solche freude im hymel vnd lust meyns
Herrn solt hindern / vñ dir mit deinen teuffeln in der helle eyne
gelechter vnd gespöt vber mich anrichten vnd hofieren. Nicht
also / du solts nicht end. Hat Christus seyn blüt für mich vergo-
ssen vnd sich vmb meynen willen in den todt gegeben / Was
umb solt ich nicht auch vmb seinen willen mich in eyne kleyne

B ij

fah: geben/vñ ein anechtige Pestilentz nicht thüren ansehē?
Kannstu schrecken/so kan mein Christus stercken/kannstu tödtē/
so kan Christus leben geben/hastu giffst im maul/Christus hat
noch vil mehr erzney. Solt mein lieber Christus mit seym ge-
pot/mit seiner wolthat vñ allē trost nicht mehr gelten in mey-
nem geist/den du leydiger teuffel mit deynem falschen schre-
cken in meynē schwachen fleysch/das wolt Gott nymer mehr.
Zeb dich teuffel hinder mich/hie ist Christus vnd ich seyn die-
ner in disem werck/der sols walten/AMEN.

o ein Hound
psalm

Das ander ist die starcke verheysung Gottes/damit er ver-
tröstet alle die so sich der dürfftigen annemē vñ spricht. Psal.
41. Wol dem der sich des dürfftigen annympt/den wüdt der
HERR erretten zur bösen zeit. Der HERR wirt in Bewarē
vñ bey dem leben erhalten vnd im lassen wol gehen auff erden/
vnd nicht geben in seiner feynde willen. Der HERR wirt in
erquickē auff dem bette seins wehtages/sein ganzes lager
wandelstu in seiner krankheit. Sind das nicht herliche mecht-
tige verheysung Gottes/mit hauffen heraus geschüt auff
die/so sich der dürfftigen annemen? Was solt doch einē schre-
cken oder bewegen wider solchen grossen trost Gottes? Es
ist fürwar ein schlecht ding/vmb den dienst/den wir thū mü-
gen an den dürfftigen/gegen solche verheysung vnd vergel-
tung Gottes. Das wol Sanct Paulus sagt zu Timotheo.
Die Gotselickheit ist zu allerley nutz/vnd hat verheysung bey-
de dises lebens vñ des zukünfftigen. Gotselickheit ist nicht an-
ders den Gottes dienst/Gottes dienst ist freylich/so man dem
nehestē dienet. Es beweyset auch die erfahrung/das die so sol-
chen krankē dienē mit lieb/andacht vñ ernst/das sie gemey-
niglich behütet werden. Vnd ob sie gleich auch vergiffet wer-
den/das in dennoch nit schadet/gleich wie hie der psalm sagt
Sein ganzes lager wandelstu in seiner krankheit/das ist/du
machst im aus dē siechbette vñ kracklager ein gesund lager zc.
Wer aber eyns krankē wartet vmb geytz vnd erbt Eyl wil-
len/vnd sucht das seyne in solchem werck/da ist es auch nit wun-
der/das er zu letzt vergiffet werde vñ beschmeist/das er hinnach

fare vnd auch sterbe / ehe denn er das güt vnd erbe besitze.

Wer aber auff dise tröstliche verheysung solchs thut / ob er gleych einen zimlichen lohn darnb nimbt / als der es wol bedarff (syntemal ein yeglicher taglöhner seins lohns werd ist) Der selbige hat hie widerumb einen grossen trost / das sein sol wider gewartet werden / Got wil selbs sein warter sein / darzu auch sein artzt seyn / O welch eyn warter ist das / O welch eyn artzt ist das / Lieber was sind alle Erzte / Apoteken vñ warter gegen Got? Solt einem das nicht einen müet machen / zu den Francken zu gehen vnd in dienen / weñ gleich so vil düise vnd pestilenz an inen weren / als hare am ganzem leybe / vnd ob er gleich müste hundert pestilenz an seym halse herauß tragen? Was sind alle pestilenz vñ teuffel gegen Got / der sich hie zum warter vnd artzt verbindet vnd verpflichtet? pflu dich vnd aber pflu dich / du leydiger vnglaube / das du solchen reichē trost solt verachten / vnd lest dich eine kleine düiss vnd vngewisse fahrmer schrecken / den solche Götliche / gewisse / trewe verheysung gestercken. Was hülfss / weñ alle erzte da weren vñ alle welt dein müste warten / Got aber were nicht da? Vnd widerumb / was schadets / wenn alle welt von dir lieffe vnd kein artzt bey dir blibe / so Got aber bey dir blibe / mit solcher verheysunge? Mainstu nicht / das du als denn mit vil tausent Engeln vmbgeben bist / die auff dich sehen / das du die pestilenz mit füßen magst trettē? Wie im. 91. Psalm stehet. Er hat seinen Engeln Bofolhē vber dir / das sie dich bewaren auff allen deinen wegē / Auff den henden werdē sie dich tragē / das du deinen fuß nicht an eynen steyn stoffest / Auff dem Löwen vnd Attern wirstu gehen / vnd treten auff den jüngern löwen vnd drachen.

Darumb lieben freunde / laßt vns nicht so verzagt seyn vnd die vnsern / so wir verpflichtet sind / nicht so verlassen / vñ für des teufls schrecken so schendlich fliehen / dauon er vber vns eine freude vñ spot / vñ Got on zweyfel sampt allen Engeln einen vnwillen vnd vnlust hat / Dañ das wirdt gewislich widerumb war seyn / Das wer solche reiche verheysunge vnd Gottes gebot veracht / vñ die seinen lest in nöten / das der schuldig wird

B ij

seyen an allen gebotten Gottes / vnd ein möder erfunden wer-
den an seynem verlassen nehesten / Vnd da werden sich denn
solche verheysung umbkeren (sorge ich) vnd inn grausame
drewen verwandeln / vnd den psalm wider die selbigen also
deuten / Unselig ist der / so sich des dürfftigen nicht annimt /
sonder fleucht vnd verlest / Den selbigen wirdt der **HERR**
widerumb auch nicht erretten zur bösen zeyt / sonder auch von
im fliehen vnd verlassen / Der **HERR** wirt in nicht behütet
noch bey dem lebē erhalten / vnd wirds im nicht lassen wol gehen
auff erden / sonder geben in seiner feynde hende / Der **HERR**
wird in nicht erquickt en auff dem bette seines wehtages / noch
sein lager verwandeln in seiner krankheyt / Den mit welchem
mass wir messen / wirdt vns wider gemessen werden / Da wirdt
nicht anders auß / Solchs aber ist schrecklich zu hören / noch er-
schrecklicher zu gewarten / vnd aller erschrecklichst zu erfahren /
Dann was kan da sein / da Got die handt abthut vnd verlest.
anders denn eytel teuffel vnd alles vbel? Nun kans nicht an-
ders sein / wo man so den nehesten verlest wider Gottes wort
vnd gebot / Vnd wirdt ein yeglichen gewißlich also ergehen
Er thū denn gar redliche büsse dafür.

Das weys ich aber wol / wenn Christus selbs oder sein müt-
ter yetzt etwa krank lege / da were ein yeglicher so andachtig
das er gern diener vnd helffer wolt seyn / Da wurde ein yeglis-
cher wollen küne vnd keck sein / Niemandt wolt fliehen / son-
der alle zu lauffen. Vnd hören doch nicht / das er selbs spricht /
Was jr den geringsten thut / das thut jr mir selbs / Vnd da er
vom ersten gebot saget / spricht er / Das ander gebot ist dem
gleich / du solt deinen nehesten lieben als dich selbs / Da hörstu /
das der liebe gebot zum nehesten / gleich sey dem ersten gebot /
der liebe zu Got / Vñ was du deinem nehesten thust oder lestest
sol heysen so vil als Got selber gethan vñ gelassen. Wiltu nu
Christo selber dienen vñ sein warten / wolan so hastu da vor dir
deinen krankten nehesten / gehe hin zu im vnd diene im / so fin-
destu gewißlich Christū an im / nicht nach der person / sonder in
seinem wort. Wiltu aber vñ magst deinem nehesten nicht dies

nen / so glaube fürwar / wenn Christus selbs da were / du thettest
eben auch also / vñ liessst in ligen / vñ ist nicht bey dir / den eytel
falsche gedanckē / die dir einen vnnützen dunckel machen / wie
du Christo woltest dienen / wenn er da were / Es sind eytel lügē /
den wer Christo leyblich dienen wurde / der dienete seinem nes
hesten auch wol. Das sey gesagt zur vermanung vnd trost / wi
der das schendliche fliehen vñ schrecken / damit der teuffel vns
ansicht / wider Gottes wort vnd gebot zu thun an vnserm nes
hesten vnd sündigen allzu seer auff der lincken seyten.

*flucht in
pestilenz*

Widerumb sündigē etliche allzu seer auff die rechten seyten
vnd sind allzu vermessen vnd keck / also das sie Got versuchen /
vñ lassen alles anstehen / damit sie dem sterben oder pestilenz
werden solten / verachtē erzney zunemen / vñ meydē nicht stette
vñ person / so die pestilenz gehabt vñ auff kumen sind / Sonder
zechen vnd spilen mit in / wollen damit ire freydigkeyt bewey
sen / vnd sagen / Es sey Gottes straffe / wolle er sie behüten / so
wirdt ers wol thun / on alle erzney vnd vnsern fleys. Solches
heyst nicht Gott trawen / sondern Got versuchen / Dan Got
hat die erzney geschaffen vñ die vernunft gegeben / dem leybe
für zustehen vnd sein pflegen / das er gesundt sey vñ lebe. Wer
der selbigen nicht braucht / so ers wol hat vñ kan / on seines nes
hesten schaden / der verwarloset seynen leyb selbs / vnd sehe zu /
das er nicht seyn selbs mörder erfunden werde für Got / Damit
mit der weyse möcht yemandt auch essen vnd trinckē / kleyder
vnd hauß lassen anstehen / vnd keck sein in sein glauben / vnd
sagen. Wölle in Got behüten für hunger vnd frost / werde ers
wol on speyse vnd kleyder thun / Der selbige were freylich sein
selbs mörder. zu dem / ist das noch grewlicher / das ein solcher
so seynen leyb also verwarloset / vnd der pestilenz nicht hilfft
werden / so vil er kan / möchte damit auch vil ander beschmeysen
vñ vergifften / welche sunst wol lebendig bliben / wo er seynes
leybs (wie er schuldig ist) hette gewartet / vñ wurde also auch
schuldig seines nehesten todes / vñ vil mal für Got ein mörder
Fürwar solche leut sind gerad / als wenn ein hauß in d stad bren
nete dē niemand werete / sonder liesse dem feur raum / das die

es

ganze stat verbrennete / vnd wölte sagen. Wils Got thun / so
wirdt er die stat wol on wasser vnd leschen behüten.

Nicht also / meine liebe freunde / das ist nicht sein gethan /
Sonder / brauche der ertzney / nym zu dir was dir helffen kan /
reüchere hauß / hoff vnd gassen / meyde auch person vnd stet /
da dein nehester dein nichts bedarff / oder auff künen ist / vnd
stelle dich / als eyner der eyn gemeyn feür gerne wolte helffen
dempffen / Den was ist die pestilenz anders denn ein feür / das
nicht holz vñ stro / sonder leib vñ leben auffreisset. Vnd dencke
also / Wolan der feyndt / hat vns durch Gottes verhencfniß
giffte vñ tödliche geschmeyß herein geschickt / so wil ich bitten
zu Got / das er vns gnedig sey vnd were. Darnach wil ich auch
reüchern / die lufft helffen fegen / ertzney gebē vñ nemen / meye
den stet vnd person / da man mein nichts bedarff / auff das ich
mich selbs nicht verwarlose / vnd darzu durch mich vñ vielleicht vil
andere vergiffen vnd anzünden möchte / vnd jnen also meine
hynlessigkeyt vrsach des todes sein. Wil mich mein Got dare
über haben / so wirdt er mich wol findē / so hab ich doch gethan /
das er mir zu thun gegeben hat / vnd bin weder an meinem ey
gen noch ander leute tode schuldig. Wo aber meyn nehester
meyn darff / wil ich weder stet noch person meyden / sonder frey
zu jm gehen vñ helffen / wie droben gesagt ist. Sihe / das ist ein
rechter Gotfürchtiger glaube / der nicht thumtüne noch frech
ist / vnd versucht auch Got nicht.

Widerumb der die pestilenz gehabt / vñ zu kressten kumbt /
sol auch selbs die leute meyden / vnd nicht wöllen bey sich leys
den / on not. Denn wierwol man jm sol in seiner not bey stehen
vnd nicht lassen / wie gesagt ist. So er aber nun auß der not ist
kunen / sol er sich auch widerumb gegen die andern halten / das
niemandt vmb seinen willen in seine ferligkeyt kume / on not /
vnd vrsache gebe einem andern zum tode. Den wer ferligkeyt
liebet (spricht der weyse man) der wirdt darinnen verderben.
Wen man sich also in einer stat hielte / das man keck im glaus
ben were / wo es der nehesten not fordert. Vnd widerumb für
sichtich / wo es nicht not were / vnd hülffe ein yeglicher also

Eccl. 3.

der gifft weren / wo mit man kündte / so solt freylich ein gnedigs sterben in solcher stad sein. Aber wens also zügehert / das ein teyl alzu verzagt ist vñ fleucht von seinem nehisten in der not. Das ander teyl alzu thum küne / vñ nicht hilfft werē / sonder mehien / da hat der teuffel güt machen / vñ müs wol dz sterben groß werden. Den auff beyden seyten Got vnd mensch höchlich belaydigt wirt / hie mit versuchen / dort mit verzagē. So iagt den der teuffel wer da fleucht / vñ behelt gleychwol den der da bleybt / das jm also niemand entlaufft.

Vber das sind ettliche noch erger / welche so die Pestilenz heymlich habē / vnter die leute ausgehen / vñ haben solchē glauben / wo sie ander leute kündten damit beschmeissen vnd vergifften / so wurden sie der selbigē loß vñ gesund / gehen also in solchē namen beyde auff gassen vnd in heuser / das die Pestilenz wöllen andern oder jren kindern vñ gesinde an den hals hengen / vnd sich damit erretten / Vñ wil wol glaubē / das der teuffel solchs thū vñ helffe also das redlin treyben / das es also gee vnd geschehe. Auch laß ich mir sagen / das etliche so verzweyßelt bößhafftig sind / das sie mit der Pestilenz alleine darumb vnter die leute / oder in die heuser lauffen / das in layd ist / dz die Pestilenz nicht auch da ist / vñ wöllen sie dahin bringen / gerade als were dise sache ein solcher scherz / als wen man yemāds zur schalckheit leuse in pelz oder fliegen in die stubē setzet / Ich weyß nicht / ob ichs glauben sol / Ists war / so weyß ich nicht / ob wir Teutschen / menschen oder selbs teuffel sind. Vnd zwar man findet vber alle masse grobe böse leute / So ist der teuffel auch nicht faul. Aber meyn rath were / wo man solche funde / das sie der richter bey dem kopffe neme / vñ vberantwortet sie Meyster Hansen / als die rechten mütwilligen mörder vnd bösewichter / Was sind solche leute anders denn recht meuchelmörder in der stad ? gleich wie die meuchelmörder stossen hie vnd dort ein messer durch eynen / vnd müs dennoch niemandt gethan haben. Also schmeissen dise auch / hie eyn kindt / da eyn weyb / vñ müs auch niemandt gethan haben / vnd gehen dennoch lachend dahin / als hetten sie es wol ausgericht. Mit der

C

auff Pöge

weise/were es besser bey wilden thieren zu wonen/den bey sol-
chen mördern. Difen mördern weiß ich nicht zu predigē/sie ach-
tens nicht/ Ich Befelhs der oberkeit/das die zu sehe vñ mit hilf
vnd rath/nicht der erzte/sondern Meyster Hansen da zu thū/
Hat nu Got selbs im alten Testament befolhen die aussetzigē
aus der gemeyne zuthun vnd aussen für der stadt zu wonē/vmb
das geschmeys zuvermeyden. So sollē wir ia vil mehr also thun
in disen fehlichen geschmeys/das so sie yemandt kriegt / sich
als balde von den leuten selbs thū/oder thun lasse / vnd fluchs
mit erzney hülffe gesucht/ Da sol man jm helfen/vnd in solch
er not nicht lassen/Wie ich dioben genügsam habe angezeygt
auff das also die gifft bey zeyt gedempfft werde/nicht alleyne
der eynigen person/sondern der ganzen gemeyne zu güt/wel-
che dadurch möcht vergifft werden/so man sie liesse so außbrea-
chen vnd vnter ander kumen. Denn also ist yetzt vnser Pestis
leng hie zu Wittenberg/alleyne aus geschmeysse herkumen/
Die lufft ist Got lob noch frisch vñ reyn/Aber aus lauter thum
kühneyt vnd verseümunge/hat sie etliche/vnd der wenig/ver-
giffte. Wiewol der Teuffel sein freudenspil hat/mit dē schrea-
cken vñ fliehē/so er vnter vns treybt/Got wolt jm werē/Ame.
Das ist vnser verstand vñ meynung/von dem fliehen für dē
sterben/So euch etwas anders duncken sol/das wolt euch got
offenbaren/Amen. Weyl aber diser bueff so durch den druck
ausgehen/das auch die vnsern den selbigē lesen sollen/So sehe
ichs für güt an/eyne kurze vndterricht daneben zu stellen/wie
man sich auch der seelen halben schicken vnd halten sol/in sol-
chen sterbens leufften/wie wir denn die selbigen auch münd-
lich auff der Cangel gethan vnd teglich thun/damit wir auch
vnserm ampt gnüg thun/die wir zu seelsorgern beruffen sind.
* Erstlich sol man das volck vermanen/das sie zur kirchen in die
predigt gehen vnd hören das sie lernen Gottes wort/wie sie le-
ben vnd sterben sollen/ Den da sol man acht auff haben/das/
welche so rohe vnd rauchlos sind/das sie Gottes wort verachs-
ten weyl sie leben/die sol man auch widerumb lassen ligen in
ihrer franckeyt/Es sey denn/das sie mit grossem ernst/mit wey

nen vnd klagen / ire reu vnd büsse beweysen / Den wer wie ein
Zeyde oder hund wil leben / vnd des keyn öffentliche reue hat
den wöllen wir auch das Sacrament nicht reichen / noch vnt
ter der Christen zal annemen / Er mag sterben / wie er gelebt
hat / vnd sehe für sich / Denn mir sollen den sewen nicht perlen
fürwerffen / noch den hunden das heyligthum. Man findet
leyder so vil grobs verstockts pöfels / das weder im leben noch
sterben für seine seele sörgt / gehen hin vnd ligen sterben auch
dahin wie die klöge / da weder syn noch gedancfen ynn ist.

Zum andern / das eyn yeglicher sich selbs zeytlich schicke vñ
zum sterben bereyte / mit beychten vnd Sacrament nemen als
le acht tage oder vierzehnen tage eyn mal / versüne sich mit seya
nem nehesten / vnd mache seyn Testament / auff das / ob der
Herr anklopffet vnd er vberylet wurde / ehe den Pfarher oder
Caplan dazü kumen kundten / er gleychwol seyne seele versora
get vñ nicht verseümet / sondern Gotte befolhen habe / Den es
auch nicht wol müglich ist / Wo groß sterben ist vñ nur zween
oder drey seelsörger sind / das sie zü allen gehen mügen / vñ eym
yeglichen aller erst alle ding sagen vnd leren / was eyn Chri
sten mensch wissen sol in sterbens nöten. Welche aber hieryñ
lessig vñnd seümic seyn werden / die geben für sich selbs rech
nung vnd sey ire schuld / ob man nicht kan für irem bette / einen
teglischen sonderlichen predigstul vnd altar halten / weyl sie dē
gemeynen predigstul vñ altar so haben verachtet / dazü sie got
beruffen vnd gefordert hat.

Zum Dritten / Wenn man aber ia der Caplan oder seelsor
gerbegerd / das man sie fordere oder lasse die francken ansa
gen / bey zeyt vnd im anfang / ehe die franckheit vberhand nys
mpt / vnd noch synn vnd vernunfft da ist. Das sage ich dar
umb / Denn es sind etliche so verseümiclich / das sie nicht ehe las
sen fordern oder ansagen / bis die seel auff der zungen sitzt / vnd
sie nicht mehr reden können vnd wenig vernunfft mehr da ist
Da bittē sie den / Lieber Herr / sagt jm das beste für zc. Aber vor
hin wen die franckheit anfehlet / wünschet sie nit / das man zu jm
keme / sonder sprechē / Eys hat nicht not / Ich hoff es sol besser

C ij

*im Sterben
zeitlich dē
Sacrament
nemen*

werden. Was sol doch ein frumer Pfarher mit solchen leuten
machen/die weder für leyß noch seele sorgen/ leben vñ sterben
dahin wie eyn vieh/solchen sol man denn im letzte augenblick
das Euangelion sagen vnd das Sacrament reychen / gleych
wie sie vnter dem Bapstum gewonet sind / da niemandt ges
fragt hat/ob sie glauben oder das Euangelion wissen /sonder
das Sacrament in den hals gestossen/als in einen Brodsack.

Nicht also/Sondern/Welcher nicht reden oder zeichen ge
ben kan (sonderlich so ers so mütwilliglich verseümet) wie er
das Euangelion vnd Sacrament glawbe/verstehe vnd Bege
re/so wollen wir es jm nichts vberal reichen/Denn es ist befol
hen/das heylige Sacrament/nicht den vnglaubigen / sonder
den glaubigen zu reichen/welche iren glauben sagen vnd be
kennen mügen. Die andern mügen faren/wie sie glauben/wir
sind entschuldigt/weil es weder an predigen/leren/vermanen
trösten/Besuchen noch an yrgent eym vnsern ampt oder dienst
feylet. Das sey kürzlich die vnterricht /so wir an den vnsern
oben/Nicht für euch zu Breslaw geschriben/Denn Christus
ist bey euch/Der wird euch wol/on vnser züthun /leren reych
lich durch seyne salbe/alles was euch not ist/Dem sey lob vnd
ehre sampt Got dem Vater vnd heyligen geyst in ewickheit/
AMEN.

Weyl wir aber in dise sache kumen sind vom sterben zu redē
kan ichs nicht lassen/ auch von dem begrebnis etwas zu redē.
Zuffs erst/laß ich das die Doctores der erzney vtheilen vnd alle
die des baß erfahren sind/obs fehlich sey/das man mitten in
stedten kirchhöfe hat/Denn ich weysß vnd verstehe mich ni
chts drauff/ob aus den grebern dunst oder dampff gehe/der die
luft verrücke. Wo dem aber also were/so hat man aus obge
sagten warnungen vsachen gnüg / das man den kirchhoff
auffer der stadt habe / Denn wie wir gehört haben / Sind
wir allesampt schuldig der gifft zu weren / wo mit man ver
mag. Weyl Gott vns geholffen hat vnser leybs also zu
pflegen/das wir seyn schonen vñnd warten / so er vns nicht
not zü schickt/vnd widerumb auch/denselbigē getrost wagen

vnd auffsetzen / wo es die not fordert / auff das wir damit beyde zu leben vnd zu sterben / seinem willen bereyt sein / Denn niemandt lebet im selber / niemandt stirbet im selbsts / als Sanct Paulus sagt zum Römern. 15.

Das weysß ich wol / das bey den alten der brauch gewesen ist beyde vnter Juden vnd Heyden / beyde vnter heyligē vnd sündern / das begrebnuß außser der stat zuhaben / vnd sie sind ja so klüg gewesen als wir seyn mögen / Denn also zeyget auch das Euangelion Sanct Lucas / da Christus der witwen sun vom tode auffweckt im stadthor zu Nain / vnd der Text sagt / Man trüg in zur Stat hyn auß zum grabe / vnd gieng vil volcks mit jr / das freylich des landt weyse do zumal gewesen ist / außser den stetten die begrebnuß zuhabē. Auch Christus grab selbst außser vor der Stat bereyt war. Des selbigen gleichen Abraham sein begrebnuß kauffte auff dem acker Ephion / bey der zwysfachen hülle / dahyn sich die Patriarchen alle begraben ließen / Daher auch die Latinsche sprache / Efferrri heysset / Das ist / hyn auß tragen / das wir zum grabe tragen heysßen / Denn sie trugen sie nicht allein hyn auß / sonder verbranten die leychen alle zu puluer / auff das die luft ja auffß reynest blibe.

Darumb mein rath auch were / solchen exempeln nach / das begrebnuß hyn auß für die stat machen. Vnd zwar / als wir hie zu Wittenberg einen kirchhoff haben / solte vns nicht alleyne die not / sonder auch die andacht vnd erberkeyt darzu treyben / ein gemeyne begrebnuß außser vor der Stat zu machen / Dann ein begrebnuß / sol ja billich ein feiner stiller ort sein / der abgesondert were von allen orten / darauff man mit andacht gehen vnd stehen kündte / den todt / das Jüngste gericht vnd außers-
stehung zu betrachten vñ beten / also das der selbige ort gleich eine erliche / ja fast ein heylige stette were / das einer mit forcht vnd allen ehren drauff kündte wandeln / weyl on zweyffel / etliche heyligen da ligen. Vnd da selbst vmbher an den wänden künd man solche andechtige bilder vnd gemelde lassen malen.

Aber vnser kirchhoff / was ist er vier oder fünff gassen / vnd zwen oder drey marckt ist er / das nicht gemeiner oder vnstiller

*solche bilder
malen*



ort ist in der ganzen Stat/ den eben der kirchhoff/ da man tegs
lich / ja tag vnd nacht vber laufft / beyde menschen vnd vñhe/
vnd ein yeglicher auß seinem hauß ein thür vnd gassen drauff
hat / vnd allerley drauff geschicht / vñlleicht auch solche stücke/
die nicht zu sagen sind / Dadurch wirdt denn die andacht vnd
ehre gegen die begrebnüß gang vnd gar zu nicht / vnd helt yes
derman nicht mer dauon / denn als wenn yemandt vber eynen
schindenleych lieffe / das der Türcke nicht so vñehrlich kündte
den ort halten / als wir in halten / vñ solten doch da selbst eytel
andacht schepffen / den todt vnd aufferstehung bedencen / vñ
der heyligē so da ligen / schonen / Aber wie kan man solchs thun
auff ein gemeynen ort / da yederman muß vberlauffen vnd vor
yedermans thür auffstehet? das / wenn ja ehre sol im begrebnüß
gesucht sein / ich so mehr in der Elbe oder im walde ligen wolt.
Aber wenn das grebnüß draussen auff ein abgesonderten stille
len ort lege / da niemandt durch noch drauff lieffe / so were es
gar geystlich / ehrlich vñ heylig anzusehen / vnd kündte auch zu
gericht werden / das es zur andacht reygte / die so drauff gehen
wölten / Das were mein rath / Wers thun wil der thū es / wers
Besser weyß / der fare ymmer fort / Ich bin niemands Herr.

Am ende aber vermanen vnd bitten wir euch / omb Christus
willen / das jr sampt vns helffet kempffen / mit bitten zu Got
vnd leren wider die rechte geystliche Pestilenz des laydigen
Satans / damit er yetzt die welt vergifft vnd beschmeyst / sons
derlich / durch die Sacraments lesterer / Wiewol auch sunst da
neben vil andere rotten auff gehen / Denn Sathan ist zornig /
vnd fület villeycht den tag Christi vorhanden / darumb tobet
er so gewulich / vnd wil vns den Heyden Ihesum Christ neo
men / durch seine geysterey / Vnter dem Bapstumb war er eytel
fleysch / das auch Mönckappen musten heylig sein / nu wil er
eytel geyst seyn / das auch Christus fleysch vnd wort sol nichts
sein. Sie haben mir auff mein büchlein lengest geantwortet.
Mich wundert aber / das bis auff disen tag nicht her gen Wit
tenberg kummen ist. Ich wil so Got verleyhet / noch ein mal
drauff antworten / vnd darnach sie lassen faren. Ich sehe doch /

Das sie nür erger dauon werdē / vñ sind wie ein wanze / welche
von jr selbs vbel stinckē / Aber ye mer man sie zureybet / ye erger
sie stinckē. Vnd hoffe / wer zu erhalten ist / dem sey durch mein
Büchlein gnug geschriben / wie denn Got lob / vil dadurch auß
irem rachen gerissen / vñ noch vil mer in der warheyt gesterckē
vnd bestetiget sind / Christus vnser Herr vnd Heyland behalte
euch alle in reynem glauben vnd brünstiger liebe / vnbesleckē
vnd vnstrefflich auß seinen tag sampt vns allen. Amen.

Bittet für mich armen sündler.

2261

Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.

N.C.



13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

ULB Halle 3
002 421 747






Q.N. 204. 13.

Vg
2261

Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19

B.I.G.

Farbkarte #13

Blue Cyan Green Yellow Red Magenta White 3/Color Black



Ob man
für dē ster
ben fliehen
muge.
Mart. Luther
M.D. XXVII.